

楞嚴貫攝

(一)

序一

楞嚴貫攝者。非眼先生津梁後學而作也。此經之解多矣。何復煩此。曰。經者西方聖人談道之書也。然聖人之書。原是聖人之言。聖人之所言者。誠與世人不同。而其言之有倫有脊。爲呼爲應。一字一句。定有銷歸。幾段幾章。自相鉤鎖。則必與世人之言同。而尤詳盡者也。如是。則後世之讀經者。必盡曉聖人之言。而後能得聖人之意。尤必如面聆聖人之語。而後能會聖人之言。故文人之技。去道遠矣。而有時妙用其長。震於鐘鼓。而朗於日月。當亦大覺所爲破顏微笑者也。然則古德時賢。紛綸諸解。豈猶有所未足歟。曰。其用不同也。夫車舟歧於燕吳。而裘葛分於寒燠。非有優劣存焉。而適宜則固逕庭矣。諸師之解。抉微剖密。各有專長。而或申其義。或未體乎詞。求其呼應分明。脈絡通徹。蓋未易數數然矣。先生此編。顧盼生情。宛

轉會義。蓋有出於諸師之外。而補其所不及。通其所未了者。夫修多羅蓋亦多矣。而佛頂獨爲尊勝。不止破顯盡致。堂室窮幽。半滿邪正之歷歷分明。良由房相運筆。文字入妙。遂令乾竺奧義。白日中天。則先生此編。固調御所囑累。而清河之功臣也。夫文之載道也固矣。而道未明。亦有二端焉。義學龍象。非曰乏人。而外典之博涉未深。故下筆時有齟齬。求其一一文從字順。虛實咸宜。卽古德往往有遺議。至於宗門直指。自詫不落言詮。恐一傍語言。便成教相。不屑爲青龍疏鈔。而翻留心李杜韓歐之業。區區與文士爭長。是可怪也。苟謂筆墨在真如之外。彼地水火風。且已兼收者何故。苟謂般若在語言之外。此方真教體。清淨在音聞。調御於斯。不話墮乎。夫千里之流。一曲偶闕。則不貫。一闕之奏。抑揚不盡其致。則曲不成。而況聖人精微之語。寧可鹵莽遇之。而托於卓犖觀大意。以免玩物喪志之譏。

乎。彼諸君子之論。夫固有爲言之也。蓋古人間出之資。與忘言之教。固有斷章取意而有會者矣。固有一字一句。而磕著築著者矣。固有郢書燕說。而獲大益者矣。不止是也。卽以本經言之。固有知見立知。句讀錯斷。而證入者矣。更以禪宗言之。固有聞挽歌艷詩。而桶底脫然者矣。不止是也。以他方世界言之。固有以飲食香臺。而作佛事者矣。卽棒喝猶爲鈍置。而況語言乎。然以言乎一人之悟殊方之法則可。而欲以投袂婆之機。演大雄之法。舉先聖人耳提面命之言。一一令千百年以後之人。順乎耳而浹乎心。飽性海之玳波。睹義天之朗曜。當在此不在彼也明矣。不佞卒業斯編。不覺忻然合掌曰。佛頂光明。復燦四天下矣。蓋修多羅之義。震旦譯云契經。上則契諸佛之理。而下亦必契衆生之機故也。經之爲義。曰貫曰攝。貫穿所說至道。攝持所化衆生故也。先生此編。仿儒者經書講章之例爲之。

以必肖必透爲則。其理契先佛者。既已擇取諸師之妙解而用之。至於語言如生。允貫允攝。以俯契羣機者。向來得未曾有。視紫柴講錄。尤爲盡善。當與大圓張尙書金剛義趣廣演。並有千秋無疑矣。交光之後。復策奇勳。是可喜也。不佞每訝井絡之墟。宗風不墜。昭覺大師以比丘身現。內江相國以宰官身現。今先生又以淨名龐老。鼎足其間。皆可云優曇華迦陵音矣。此編行世。六字同風。人共知金色頭陀。方在雞足山中護持佛衣。俟面授補處菩薩。豈知慶喜尊者。亦方於獅子座上。現在結集佛語。不惜更下註脚。慈悲末法衆生乎。

康熙丁未一陽月長至日 宗人府丞前吏部左侍郎兼國史院學士東
蒙高珩拜撰

序二

瞿曇氏以一大事因緣出現於世。四十九年。廣宣妙諦。窺其義蘊。幾於入海算沙。而蓮華楞嚴。尤爲教乘至寶。然蓮華爲佛全身。而楞嚴爲佛之頂。則以此經究竟堅固。始乾慧以迄等覺。莫不因頂薰修。直踏毘盧頂上。爲大覺最尊勝之法。蓋作佛之津梁。而蓮華之精要也。開佛知見。舍此蔑由。所以自天台以來。前賢接踵。代有闡發。雖繁簡不同。而婆心則一。大約以貫諸說之統宗。攝羣倫而加被。爲不失瞿曇氏說經之旨焉。迨別傳東來。宗教互詆。宣鑒大師。一見龍潭。燒却青龍疏鈔。以爲窮諸元辯。若一毛置於太虛。竭世樞機。似一滴投於大海。於是纔涉言詮。便成剩義。而瞿曇氏密因修證了義。菩薩萬行同圓。非說可說之妙。幾有故紙置之者矣。嗟乎。根有利鈍。機有遲疾。苟謂單提別傳。便可盡廢義學。則瞿曇氏纔離兜率。便當以雙趺公案。徑示飲光。何爲橫說豎說。頻轉佛輪。若是其不憚煩而

從上先德。又何以有日處虛空之喻乎。甚矣弘經功德。度越恆沙。或緇或素。不一其人。大約親承。蒞記。隨遇現身。使慧炬常然。佛幢不倒。苟非乘夙願力。詎能措一辭哉。若乃以文人之精思快筆。疏調御之奧談。以世書之章句段落。分貝多之脈絡。喻諸決流。源源歸海。譬如理機。絲絲入扣。辯才無礙。顯密全彰。求之今日。則非眼先生其人矣。先生宿學巨儒。隱居著述。尤邃五家宗旨。遂輯楞嚴貫攝一書。篇帙之成。需之二十七年之久。蓋用志專勤。欲以一人之精力。抉萬類於迷津。仁哉其卽瞿曇氏之用心乎。篇中以佛言語。證佛智慧。不卽不離。有倫有脊。真乃無所不貫。無所不攝。蓋先生於此經。始得會解。繼見合轍。又因離公得讀正脈。而終取材於竟陵之如說。可謂集衆腋以成裘。錯五采而施繪矣。至於就簡刪繁。直截貫串。剖微抉奧。開卷了然。予小子讀而快之。如覩優鉢羅華。雖欲不歡喜讚歎。

不可得也。遂因先生之命而爲之序。

康熙己酉五月崑山年家子徐元文頓首拜撰

序三

夫說法者。無法可說。解經者。借解傳經。無法可說。不妨橫說豎說也。借解傳經。貴在一解衆解也。自經流震旦。而楞嚴後至。解經者固多。解楞嚴者尤多。然或條分縷析。曲證旁稽。而反乖於融通渾一。或拘文敷衍。數墨循行。而遂流於支離浮蔓。則又不如無解。此達大師所以勸人專讀白文也。自解楞嚴以來。唯天如十家會解。盛行於世。迨一雨法師合轍出。而生面別開。至交光法師正脉出。而奧義闡盡。雲棲蓮老。搭衣禮拜。閣筆不註。有以也。其後鍾伯敬。賀中男。又約正脉之旨。而著爲如說。頗出新意。了庵居士。乃匯諸家。而以吾儒講章之法編之。初名貫攝。改名說通。嗚呼備矣。予

得而卒業焉。見其痛掃科掇之葛藤。獨標直捷之妙義。而精神全在承接過脉中。使十卷如一卷。一卷如一句。一句如一字。昔之開卷而欠伸欲睡者。今則愈讀而津津有味。若唯恐其速盡也。所謂借解存經。而一解衆解者。不其然乎。若夫居士以再來人。弘三教緒。澡身如霜。枝雪榦。淬品如潭。月松風。其深修密煉。在語言文字外者。高徐二先生既言之。予奚贅焉。康熙辛亥秋八月 賜進士出身雲南道御史奉差巡視兩浙鹺政關中 通家世弟熊焯拜書

編輯始末

余庚辰歲客京師。始閱楞嚴會解。閱凡再。僅窺其大意而已。丁亥避亂於梁山之金城寨。又得會解讀之。稍復通曉。於時竊有願焉。顧安得淹貫明白。若儒家之講意者。以廣引末學乎。戊子冬。隨集仙宗兄。過達州之漢城寨。忽得合轍一卷。於斷殘經帙中。取而誦之。心開神躍。曰。此可爲講意資糧矣。而全本亦未見也。己丑至嘉陵。參離指和尚。云有合轍全本。庚寅乃求得而卒業焉。則又躍然歎。未曾有。和尚謂余合轍固善。不如正脉之尤善也。余又求正脉讀之初。苦其科掇煩碎。屢閱屢置。及觀其簡識取根。不用天台止觀種種卓見。高出羣疏。相傳蓮師初見此本。望北焚香。搭衣禮拜。良有以也。而余之講意。可以編矣。爰取正脉合轍二書。研味參伍。用經書講章之例。融會而編之。分章過脉。聯絡照應。必肖先佛口脛。必透後學心胸。而繁碎科分。槩從芟去。大約取正脉十之六。合轍十之四。而余間有

管窺亦附十之一焉。權輿於辛卯正月。告竣於壬辰九月。書成凡十卷。敬質之離和尚。和尚不以爲謬。而令存其草本。以待緣而梓焉。順治庚子。余就養復入都門。此本尚留嘉陵。未之攜也。偶於報國寺集。得如說一函。閱之。書成於鍾伯敬。賀可上兩居士。大約亦本正脈而參以新裁。往往妙合佛旨。至丁未春。次男如淮來自嘉陵。乃緘余草本至。宛然故舊重逢。喜可知也。於是復加較定。而以如說參之。蓋前後二十七年。而大願始畢。可以無憾矣。至於剞劂流布。予未敢必。適同鄉高平令白君田生。讀而善之。首捐百金。倡刻三卷。而唐謝兩君和之。吾兒又卒成之。閱半載而十卷告完。其序則天官少宰高念東先生椽筆。先生今之張無盡也。聖典託名敍以傳。不尤幸乎。爰記其始末如此。俾後之覽者。鑒弘經之不易。而勿加輕褻云爾。

康熙七年秋八月朔白衣戒弟子劉道開題於燕臺之鴻雪堂

表懺疏意

伏以

佛法廣大。雖上哲莫究其津涯。

經義淵微。豈下愚可得而詮註。聊因前人之緒論。薄効編纂之寸長。既勒成書。理宜申告。仰干

獅座。

俯鑒螳忱。言念弟子劉道開。蠢蠢凡夫。茫茫業識。幸植善根於宿世。獲觀妙典於今生。憶讀楞嚴。起於庚辰之歲。及編直解。乃在辛卯之年。閱兩載而始成。盡去揅科之瑣碎。匯羣言而拔粹。務求脉理之貫通。揀識取根。不用天台止觀。芟繁就簡。例同儒氏講章。開卷了然。初學既便。其易曉。循行豁爾。鈍士不苦其難知。藏笥篋者有年。待剗劘於緣會。憑

仗

韋陀之願力。默牖檀越之信心。信官白良玉。倡刻三卷於前。信官謝述度。助刻兩卷於後。餘則弟子道開。偕男信官如漢貢生如淮隨力措辦。用襄厥成。計工資叁百餘金。裝善本一函十卷。殺青已竣。稽顙告成。爰卜本月朔日。祇就妙喜庵。延僧設供。云伏願

弘慈灼鑒。

慧力護持。倘不大謬於

聖言。尙求

陰導其流布。俾普天含識。共遊一六之門。率土孕靈。同躋圓通之域。弟子道開。不勝翹誠悚慄之至。謹意。

楞嚴說通卷一

巴郡居士非眼劉道開纂述

成都沙門離指方 示鑒訂

大佛頂如來密因修證了義諸菩薩萬行首楞嚴經

大佛頂三字。若據他經。卽是佛身三十二相中之無見頂相也。若據經顯義。是指菩提涅槃元清淨體如來藏心言也。由此心體含吐十虛彌綸。萬有爲大覺最尊最勝之頂法也。如來密因。修證了義者。不變名如。隨緣爲來。小乘如而不來。凡夫來而不如。唯我大覺。亦如亦來。故名如來。獨知獨見之謂密。出生聖果之謂因。磨鍊治習之謂修。忘心默契之謂證。無不究盡之謂了。不落言思之謂義。謂大覺依此頂法爲因。而實修實證。障盡惑空。因窮果滿。能事已畢。更無餘事。一義皆了。更無餘義。

故曰如來密因修證了義也。諸菩薩萬行首楞嚴者。首楞嚴。此云究竟堅固。謂始從乾慧。以至等覺。皆以此頂法爲因。而廣修萬行。分斷無明。分證眞理。上歷聖位。踏佛階梯。以至事事得成。堅固也。除諸佛菩薩。其餘出世小果。治世聖賢。雖亦各有悟入。依稀彷彿。窺見一斑。類皆坐在相似覺中。以不能空五蘊。銷六根。盡五住。超二死。未超心量。未至圓極故也。經者。常也。作終古之常規。爲佛燈之後焰故也。○一大二佛頂。三如來密因。四修證了義。五諸菩薩萬行。六首楞嚴。七經也。第一大者。稱讚之詞。具洪濶。包含周徧。衆多深奧。元始恆常。超勝八義。二佛頂者。法華爲佛全身。此經爲如來頂。顯斯經爲法華中精要之義也。三如來密因者。如爲本覺。來爲始覺。本始究竟。名如來也。曰密因者。取如來在凡夫時。於六根門頭。頓悟圓湛。不生滅妙明眞心。此心爲四科七大根本。

實性。具足三如來藏。全體大用。本來是佛。豈惟但是因性。亦乃卽是果性。以諸如來無別所證。乃至證時。更無毫髮增添。所謂從初發心。卽成正覺也。所以爲最密者。以此卽是二根本中真本。所謂識精元明。菩提涅槃。元清淨體。佛言一切衆生。不成無上菩提。皆爲不達此本。錯亂修習。至後偈中。又言常不開演。足顯根中所具如來藏性。乃是難測難知。最深最密之法。經文首從請定。至四卷身意輕安。得未曾有。卽此密因也。然此一段。卽是阿難所請三名中妙奢摩陀。以此三如來藏性。卽是自性本定。而頓悟了達於茲者。卽微密觀照故也。四修證了義者。以前段全彰自性本具。天真現成。然旣曰密因。豈疑修證是故。雖歆藏性之已知。更喻華屋之未入。由是開決定義門。示解結次第。蓋必解六結而越三空。方爲了義之修。獲二勝而發三用。方爲了義之證。然謂之了義。

者有二義。一者用根不用識。故蓋用識。則以生滅爲本修因。如蒸沙作飯。畢竟不成。常住菩提。故非了義。用根。則以不生滅性爲因地心。如依金作器。決定能成。無上菩提。故爲了義。又用根已爲了義。而特選耳根。更爲了義中之了義。以其超二十四聖而獨妙。爲十方三世諸佛一路涅槃之要門也。二者從性起修。因該果海。故蓋依密因無修證果海中。不妨幻修幻證。故修而無修。非事相之染修。證而無證。非新成之實證。故爲了義。而非不了義也。經文自四卷後半。請華屋之門。直至七卷前半百靈護咒。卽此了義也。然此一段。卽是阿難所請妙三摩提。以此耳根圓通。爲第一如幻三摩提故也。五諸菩薩萬行者。諸菩薩卽本經分證諸聖五十五位之數也。萬行者。卽諸位中歷修之行。如十信。十住。十行。十回向。四加行。十地。以至等覺。其行應無有量也。此之萬行。躡前了